

ERA CRASTA

Numerò 48 · març 2006

Impresi sense adreça

Plen der Ajuntament de Vielha e Mijaran

Eth passat dia 23 de hereüer se celebrèc eth Plen Ordinàri der Ajuntament de Vielha e Mijaran, e entre d'auti se tractèren es ahèrs que seguissen:

BASTIMENT D'ABITATGES DE PROTECCION OFICIAU.

Eth 25 de gèr de 2006, er Ajuntament de Vielha e Mijaran e eth Departament de Mieï Ambient e Abitatge dera Generalitat de Catalonha, signèren un convèni peth quau er ajuntament cedirà a títol de permuta ar Institut Catalan deth Sòu (INCASOL) era finca a on ei plaçat actuaument eth cine e era pista de fronton en C/ Anglada de Vielha, atau coma eth bastiment de naues viuendes ena finca que i a plaçada ath cant des viuendes de proteccion oficiau de loguèr que i a dejà bastides e adjudicades en Solan.

Ena promocion deth Solan i aurà 14 abitatges de venda e parcatges.

Era promocion deth Carrèr Anglada se dividirà en dues parts: ua part se qualificarà coma equipament a on se reservarà era planta baisha e part dera planta sosterranha entà plaçar-i eth nau cinèma e enes plantes deth dessús s'i bastiràn 16 abitatges de loguèr; era auta part se qualificarà de

Zòna residenciau damb 19 abitatges de proteccion oficiau de venda. En conjunt d'aguesta promocion se prevé un minim de 27 places de parcatge.

Tanlèu er Ajuntament de Vielha e Mijaran dispause des condicions tant de loguèr coma de crompa, atau coma es prètz, requisits e plaç d'entrèga de sollicituds entà accedir ad aquestes viuendes, ac comunicarà a toti es vesins.

BASTIMENT DETH PAVELHON POLIESPORTIU DE VIELHA

Degut a que cap empresa tant dera Val d'Aran coma de dehòra a estat interessada en realizar es òbres deth bastiment deth nau pavellon poliesportiu de Vielha allegant eth baish prètz d'execucion qu'er Ajuntament auie mercat, eth Plen aprovèc era actualizacion deth prètz entà adaptar-lo ath mercat actuaü, en tot demorar er impòrt actuaü d'execucion dera òbra en 2.437.331,93 € IVA includit.

Per tant, vista aguesta actualizacion, er Ajuntament procedirà a modificar es bases deth plec de condicions tècniques e administratives entara contractacion dera òbra e trèir-la a licitacion publica.

SUMARI

1

Plen der Ajuntament de Vielha e Mijaran

Òbres deth plan unic d'Òbres e Servicis de Catalonha (PUOSC)

2

Activitats en Casau deth Jubilat

Talhèrs de Circ e de Teatre Experimentau.

Naua sala de spinnig en Palai de Gèu

Setmana dera Solidaritat 2006.

Exposicion de pintures "Pirineu" de Mariano Gomà.

3

Hèsta de Santa Gueta

TEATRE EN VIELHA

HÈSTA DE MAGRÀS

4

SOPAR E BALH DE CARNAVAL

Òbres deth plan unic d'Òbres e Servicis de Catalonha (PUOSC)

Era Generalitat de Catalonha aprovèc eth 31 de gèr, eth Plan Unic d'Òbres e Servicis de Catalonha entà enguan, e en çò que tanh ath municipi de Vielha e Mijaran es òbres subvencionades seràn:

ENTITAT MUNICIPAU DESCENTRALIZADA D'AUBÈRT E BETLAN

1ª. Fasa dera urbanizacion deth carrèr de Sant Estèue de Montcorbau

Pressupòst	64.740,76 €
Subvencion PUSOC PG :	58.266,68 €
Aportacion dera EMD Aubèrt e Betlan	6.474,08 €

2au. Fasa dera urbanizacion integráu deth carrèr de Sant Estèue de Montcorbau.

Pressupòst	271.291,86 €
Subvencion PUOSC-PG	39.904,10 €
Subvencion PUOSC-MN	50.000,00 €
Aportacion Ajuntament Vielha	81.387,76 €

ENTITAT MUNICIPAU DESCENTRALIZADA DE GAUSAC

1ª Fasa dera urbanizacion integráu deth carrèr Major.

Pressupòrt	65.983,12 €
Subvencion PUOSC-PG	59.384,81 €
Aportacion dera EMD de Gausac	6.598,31 €

AJUNTAMENT DE VIELHA E MIJARAN Urbanizacion integráu deth Carrèr Iriassa de Vielha

Pressupòst	210.555,84 €
Subvencion PUOSC-PG	147.389,09 €
Subvencion PUOSC-DL	52.638,00 €
Aportacion Ajuntament de Vielha	10.528,75 €

ENTITAT MUNICIPAU DESCENTRALIZADA DE CASAU

2au. Fasa dera urbanizacion integráu dera Plaça Naua.

Pressupòst	102.750,21 €
Subvencion PUOSC-PG	21.925,00 €
Aportacion Ajuntament Vielha	80.825,20 €

ENTITAT MUNICIPAU DESCENTRALIZADA DE VILAC

1ª. Fasa dera urbanizacion integráu deth carrèr Dera Còsta

Pressupòst	70.400,40 €
Subvencion PUOSC-PG	63.360,36 €
Aportacion EMD de Vilac	7.040,04 €

Activitats en Casau deth Jubilat

Des de començament deth mes de hereuèr d'enguan, er Ajuntament de Vielha e Mijaran organize e coordine talhèrs entara gent grana deth Casau deth Jubilat "Sant Miquèu". Aguesta iniciativa a estat fòrça ben recebuda per part des sòcis deth Casau, que s'an apuntat tà classes de gimnastica leugèra impartides pera monitora Svetlana Dlavova, tà classes d'agilitat mentau e de manteniment dera memòria damb Conchi e Araceli e damb era coordinacion des dinamizadores culturaus der Ajuntament, es madeishi sòcis an organizat balh es dimenges ena tarde a compdar des 18,00 or.

Es classes de gimnastica leugèra se hèn es dimèrcles de 17,00 a 18,00 or., de 18,00 a 19,00 or. e de 19,00 a 20,00 or. E se vedetz que vos desbrembatz cada còp mès, de petites causes o ben auetz ganes d'aprèner e motivar era vòsta ment damb naues activitats, vos podetz apuntar tath talhèr des diuèndres des des 18,00 as 19,30 or.

Entà auer mès informacion vos podetz adreçar ar Ajuntament de Vielha e Mijaran o ben trucar ath 973 64 00 18 demanant per Araceli.



Setmana dera Solidaritat 2006.

Er Ajuntament de Vielha a previst per dusau an, era celebracion dera Setmana dera Solidaritat.

Aguesta iniciatiua recuelh un conjunt d'activitats diuèrses, organizades pes associacions e collectius deth municipi. Pendent era Setmana dera Solidaritat der an 2005 s'arremassèren 10.690,98 €, des quaus 3.021,23 € se destinèren as victimes deth Tsunami e 7.699,75 € s'envièren ara associacion "Mètges sense Frontèras".

Pròplèument vos informaram des dates de celebracion, atau coma des activitats previstes entara Setmana dera Solidaritat 2006.

Exposicion de pintures "Pirineu" de Mariano Gomà.

Eth passat dia 25 de hereuèr s'inaugurèc ena sala d'exposicions der Ajuntament de Vielha e Mijaran, era exposicion d'òlis e dibuishi de Mariano Gomà Pujades, organizada pera Fondacion Musèu Etnologic dera Val d'Aran e damb era collaboracion der Ajuntament de Vielha e Mijaran

Poderatz visitar-la enquiath dia 25 de març de 18,00 a 20,30 or, ena Av. Pas d'Arró 7 de Vielha.

Talhèrs de Circ e de Teatre Experimentau.

Er Ajuntament de Vielha e Mijaran, organize e coordine talhèrs de circ e malabars entà mainatges, joeni e adults en Palai de Gèu de Vielha. Aguesti talhèrs formen part des activitats qu'aguest ajuntament a dessenhath entàs mainatges e joeni deth municipi.

Es talhèrs de circ e malabars son a cargue de Rufi e eth sòn equip. En aguestes sessions, ath delà d'aprèner a anar en monocicle, a caminar damb chanques, a jogar ath diablo, a hèr acrobàcies e jòcs de malabars, eca, tanben poderatz participar en gincanes, fotbolins umans, hèstes de disfrassi e d'outes activitats.

Es talhèrs son es dimarss de 18 a 21 ores e es dissabtes d'11 a 13 ores.

S'ètz interessadi en participar-i, vos podetz inscriuer trucant tath 973 64 00 18, en tot demanar per Rufi.

Tanben i a dus grops de teatre experimentau ena madeisha sala deth Palai, a cargue de Maria Luisa Avalos.

Un grop ei de joeni e un aute d'adults. Se vòs vèncer era tua timidesa o sorprendre-te a tu madeish damb çò que pòs aprèner deth tònc caractèr e personalitat, apunta-te, te sorprendràs de çò qu'ès capable de hèr.

Aguesti talhèrs son es dijaus, de 17 a 19 ores entàs joeni, e de 19 a 21 entàs adults.

Entà inscriuer-vos podetz trucar as telefon 973 64 00 18 o ben 655 26 98 70, demanant per Maria Luisa.

Naua sala de spinnig en Palai de Gèu

Degut ara grana aflluència d'abonadi qu'a eth Palai de gèu de Vielha, en aguesti moments son mès de 1700, era direccion dera installacion, a decidit realizar cambis e melhores tant enes installacions coma enes sues activitats. Ua d'aguestes nauetats ei eth condicionament dera **Sala de Spinning**.

Aguesta naua sala a 147 m2, e en era i a 20 bicis Spinnig mès era der instructor, e un frontau de miralhs ath cant d'ua tarima de husta que permet visualizar perfèctament ar instructor des de tota era sala, ath delà de perméter qu'ès alumnes poguen veder-se e atau corregir era posicion deth còs ath dessús dera bici. Tanben i a diuèrsi matalassi petiti e ua espalhèra entà poder hèr estiraments dempús des classes.

Toti aqueri que sigatz interessadi en aguesta activitat podetz demanar informacion ena recepcion deth Palai o ben trucant tath 973 64 28 64.



Hèsta de Santa Gueta

Eht passat dia 5 de hereuèr, celebrèrem en Vielha era Hèsta de Santa Gueta, e es membres dera comission organizadora volem profitar era escadença entà arregraïr a totes aqueres hemnes que participèretz en aguesta Hèsta, era vòsta preséncia, ja qu'ei evident que sense vosates non i aurie motiu de celebracion.

Tanben volem arregraïr era collaboracion tant der Ajuntament de Vielha e Mijaran, coma deth Conselh Generau d'Aran, e tanben dera Parròquia de Vielha e de toti es comèrci que collaborèren damb es sòns presents.

Sonque mos quede convidar-vos a totes tà participar ena Hèsta der an que ven, e a desirar as membres dera naua comission qu'eth sòn trebalh sigue un èxit.

Gràcies a toti

COMISSION DE SANTA GUETA 2005.



Foto Ruiz

TEATRE EN VIELHA

Aguesta ei era programacion prevista entàs mesi d'abri e mai.

DIJAUS 6 D'ABRIU TÀS 22,00 or.

ANTONIA SANJUAN – MONÒLOGOS COTIDIANOS

Nominada tath Goya coma actriu revelacion ena pellicula "Todo sobre mi madre", mejançant 5 monològs realize ua divertida paròdia des hèts tan quotidians coma son es cambis en matrimòni, es esfòrci en gimnàs entà mantier-se en forma ua persona qu'a superat es quaranta, realizar torisme rurau o ben auer ua mascòta en casa.

Prètz: 16 € venda anticipada e 18 € venda en taquilla.

DIJAUS DIA 4 DE MAI TÀS 22,00 or.

VENUTS (òbra en catalan)

Sies venedors d'ua companhia d'assegurances, especializadi

ena venda de productes funeraris son cridadi entà ua amassada. Es relacions entre eri abantes e dempús dera arribada der organizador provocarà situacions non demorades que meteràn a pròva es capacitats personaus e emocionaus des persones. Prètz 15 € venda anticipada e 17 € venda en taquilla.

Es entrades per auança se poderàn comprar ena Oficina de Torisme de Vielha, e i a prètzis especiaus de 6 € entàs menors de 25 e ans e es majors de 65, atau coma abonaments a 40 €.

Aguesta activitat ei organizada per Ajuntament de Vielha e Mijaran e era Associacion ARTE e compde damb era collaboracion deth Grèmi d'Ostalaria dera Val d'Aran, de GUM FM ràdio e deth Departament de Cultura dera Generalitat de Catalonha.

HÈSTA DE MAGRÀS

CEIP GARONA

Es alumnes deth CEIP Garona de Vielha, celebrèren era sua Hèsta de Magràs eth dia 24 de hereuèr damb ua desfilada pes carrèrs de Vielha e damb era crema deth Magràs. Entà acabar participèren en ua hèsta premanida peth grop d'animacion "Era Garbèra". Enguan eth tèma ath torn deth quau an virat es actes a estat eth mon deth circ, activitat qu'a inspirat era confeccion des disfrasi tant des mainatges coma des professors.



PALAI DE GÈU

Tanben eth dia 24 se celebrèc en Palai de Gèu de Vielha era Hèsta de Magràs, en tot arténher fôrça èxit era activitat, ja que compdèren damb era participacion de 345 patinaires disfrassadi.

Eth Palai de Gèu aufric a toti es participants còca, chicolate e mochets entàs mès petits e era entrada ère de franc entà toti es qu'anèren disfrassadi



SOPAR E BALH DE CARNAVAL

Eth dissabte dia 25, er Ajuntament de Vielha e Mijaran celebrèc era Hèsta de Magràs damb un sopar e balh, en qué i participèren ua setantea de persones, prumèr damb un sopar



en Otèl Tuca de Betren e posteriorament damb un balh, ath quau i podèren assistir toti aqueri que voleren passar ua bona estona.
Des d'ací volem arregraïr-vos a toti era vòsta participacion e demoram compdar damb vosati entar an que ven.

